

偶

齋

詩

草

筆記一則

言詩者動言三百篇此門面語耳三代下詩已成小道  
不過書畫之流詩人強援以示重殊可笑也聖人選三  
代下詩必別有取法雖李杜名篇亦未必盡取也謹按  
三百篇原無意求工所謂詩言志也後世詩則有意求  
工雖李杜詩之工者亦未必盡合三百篇而詩之不工  
者却頗有合者作詩者欲自高其詩品動援三百篇以  
標門面而實不能首首宗之取詩者亦欲自高其詩教  
動援三百篇以標門面而實亦不能首首以爲衡而取

之今詩與古詩已成兩道而大家同以門面語自欺而欺人誠可笑也余嘗謂於今取詩當分兩種一專取合三百篇者不必論其工不工乃合聖人詩教一專取其工但得不大悖三百篇即可取不必強作門面若害理傷教之作雖極工亦不可取庶免爲詩教罪人作詩亦當以此爲法雖不能首首宗三百篇亦不可但求工以悅俗而致敗詩教拙稿他日擬分四集合三百篇而工者爲內集合而不工者爲內次集工而不甚合三百篇者爲外集其不甚合而復不甚工者姑存之外次集雖

不足存究亦斂費心血盡棄之亦可惜也若大悖三百  
篇者雖工亦不可存存之徒取悅俗目不惟聖人論詩  
必不取卽真知詩者亦不取也

偶齋詩草序

光緒庚辰辛巳之間紆每得朝報輒見中書省所錄侍郎寶公奏議區畫時政節概凜凜以爲王韓城孫文定後一人也壬午公典閩試紆幸出門下因得盡讀公所箸古近體詩宅心于虛靜無勞情苦慮理不鬱而辭不溺蓋馭文之首術耳癸未紆來京師公已罷官就第紆與同門高嘯桐鳳岐卓芝南孝復方雨亭家澍並來覲公常服出見座間雜置江南所得瓦盆梅花無慮廿餘本窗日暖旭列坐花間公琅琅誦其近作紆以爲公雖

去官而神思弗輟道足以勝其過矣乃比年以來累構  
家禍死亡相續極生人不堪之遇則皆遇之公委數任  
命一宣之於詩嘗獨行入西山履危崖扶長松哦嘯終  
日弔出樵夫牧豎見者咸以爲異而不知公鬱伊之深  
姑以山水發其詩終且以詩殉其身也可不悲哉庚寅  
之春紆與公子伯萐遊昆明湖歸是日公亦適歸自西  
山相見於行館公曰予五稔三喪今復自患嘔泄且殆  
若果間歲有凶則余家人亦易盡耳旣喟且笑時張弼  
余同年侍側相顧慘怛莫得所對明年公薨又明年紆

僅得展公之墓而已嗚呼公慷慨大節多所建白而卒  
不竟其用淪爲詩人以終然紆每讀公詩未嘗不見公  
之慷慨大節也公詩手定爲內集內次集外集外次集  
凡三十六卷兩亭集資刊之芝南嘯桐董其役起癸巳  
訖乙未凡二十六閱月而成紆將仿帶經堂例別訂爲  
精華錄若干卷以事莫逮也公詩巧於敘悲析辭述情  
與查初白爲近間入長慶未嘗繁雜失統則骨勝耳鳴  
呼公窮其身而終存其名後生小子日抱遺集商確於  
荒山老屋之中寒暑無敢少間者旣以悲公之窮亦正

偶齋詩草

序

所以慶公之存也

光緒乙未孟春門下士閩縣林紓謹序



偶齋詩草總目

壬庚集

壬子至庚申

寺居集

庚申至壬戌

元元集

癸亥至甲子

山阿集

甲子

學舌耕集

甲子至乙丑

鳴秋集

乙丑

歲餘集

乙丑

閒吟集

丙寅

閨妙香集

丙寅

無謂集

丁卯

羅宿集

丁卯

窮奇集

丁卯

陽生集

丁卯

入官集

戊辰

日壯集

己巳

壬申集

壬申

田盤集

壬申

東遊集

壬申

養疴集

壬申

西山集

癸酉

望洋集

癸酉

零星集

癸酉

使越集

癸酉

癸乙雜抄集上

癸酉至乙亥

癸乙雜抄集下

鼠虎集

丙子至戊寅

戊卯集

戊寅至己卯

後養病集

庚辰至辛巳

使閩集

壬午

武夷集附

家居集

癸未

養拙集

甲申

駕言集附

飯眠集

乙酉

霜樹集附

薊壘集

丙戌

霧看集題葉集附

抱孫集

丁亥

北山集妙峰詩草再游詩草附

漸知非集

戊子

游山詩草附

偶齋遺草 戊子至庚寅

偶齋社草 癸未至己丑

以上編年

鏡鸞集 乙丑

詠懷集 戊辰

冬興集 癸未

右內附集

七樂集 丁卯

田盤集 壬申

偶齋詩草

總目

西山紀游草

癸酉

右外附集

偶齋詩草內集卷一

壬庚集

壬子至  
庚申

宗室寶廷竹坡著

送成書雲宜少畊入城

數日同游宿山寺此別未知何日至勸君到處莫題名

免人見題生別思

寺居集

庚申至壬戌

移居用陶公韻

貧賤無可居爰以寺爲宅興至卽移家不分晨與夕洒掃勞近隣提携假壯役事畢沾濁醪歡飲坐敝席食罷

卽酣眠安然亦如昔同在天地間新故何分析

卽事贈宜少畊

雁飛古塞黃雲亂人哭西風白日寒大野塵昏山影暗  
荒林霜重葉聲乾危亡在邇愁何用生死難知淚勿彈  
幸得良朋暫相聚莫辭詩酒數盤桓

惜昔

小時嬉戲時明月曾照儂儂今廿一歲月尙與前同月  
雖同儂獨異榮枯相判如隔世閉門不敢看月光恐月  
見我添悲傷



元元集

癸亥甲子

補履

雙履盡敝如東郭首殘尾缺不可著幾番欲易力未能  
勉強補苴暫藏腳吁嗟乎旣不能殫心補衮居廟廊獻  
可替否從君王又不能屈身作吏涖州縣下爲愚氓補  
闕陷堂堂丈夫乃學婦人功鬚眉怕教巾幘見履兮履  
兮吾補汝未識汝可知吾苦此生事事不周全茫茫宇  
宙誰堪補

我生

我生大不幸七齡母已終隨父參養大恩與慈母同既  
教復兼養瑣碎勞親衷時時復事事置我於胸中我年  
日以長我境日以窮恨我無才能不能養親躬我昔未  
飢寒日日勞父慮父今已飢寒我竟安如故父雖已飢  
寒尙復代我憂我反若無事束手無良謀在我慈父心  
原不忍責我而我捫心問豈自覺其可母恩旣莫報又  
不報父恩寄語識我者毋以我爲人

墨

烏玉芬芳得最難龍賓十二鎮文壇精華不惜銷磨盡

遺蹟留教萬世觀

榴花

薰風吹破千枝火  
暑雨敲殘一樹霞  
顏色休驚太濃艷  
知君原是熱時花

偶題

養生苦無技  
遇事多迂緩  
蹉跎年復年  
漸不能飽暖  
賣書買脫粟  
歸來日已晚  
汲井作薄粥  
匆匆進數碗  
今日喜已飽  
明日誰暇管  
衣食不能謀  
望君恕吾懶

古劍篇

吾聞豐城有劍埋獄底斗牛夜夜神光起雷君出劍張  
君死龍躍腰閒劍沈水又聞澹臺持璧行江中兩蛟夾  
舟濤翻空拔劍一揮大波裂斷蛟噴血江雲紅更聞鴻  
門高宴聚劉項兵機突起華筵上劍光橫逼漢王頭玉  
龍穿雪纏雙將君家此劍何年留爲晉爲漢爲姬周字  
迹磨滅不可識一條秋水寒人眸血痕斑駁凝紅星當  
筵一掠西風腥寒光撲面燈不明滿堂恍惚蛟龍鳴旁  
觀變色不敢近繞身歷亂銀濤生劍兮劍兮當年合在  
英雄手今日何緣爲君有胡不持此立奇勛使劍與人

同不朽否則慨然割愛贈奇人俾渠縱橫決盡仇人首  
噫吾生豈無不平事幾度摩挲未敢試窮愁短盡書生  
氣

經故居

我昔戲園中園樹如我小今從園外過牆頭見樹杪倚  
牆問園樹視我可如故

山阿集

甲子

揭曉日作

我父教我讀日夜望我貴豈料才技卑四戰不得意今

年忽僥倖得遂高堂志回首憶前番難禁淚頻墜從茲  
當自奮磨厲成大器父母望子心原非止一第

七齡卽失恃未知酬母恩甘旨與疴癢少未盡辛勤今  
年幸登科稍藉慰嚴親母在重泉下佳音聞不聞兒貴  
縱有日終難榮母身追封雖顯揚虛文何足云

秋日口占

書齋客談久薄暮始得歸飢飮不能待行行投餠師探  
囊幸未空市之聊遏飢倦坐倚破竈大嚼條靡遺食畢  
腹果然無異在家時人生天地閒不過皆如斯隨地可

自安拘墟復奚爲

飲酒學陶

瓶中尚有酒夜寒且飲之酒盡身已溫卽我當眠時人  
生天地中貧富皆如斯隨時可行樂樂盡何必悲乘化  
以待盡感慨欲胡爲

我生不能飲三杯心已悸雖非酒中人頗得酒中味所  
恨囊屢空欲飲不能致偶爾得香醪沈飲卽酣睡無酒  
何妨止有酒何妨醉人生本無定隨處堪適意

學舌畊集

甲子乙丑

傷歌行

拔劍繞室行北風捲樹寒月明投筆倚窓立昏烟塞屋  
燈光濕男兒有志不得伸功名富貴安足論行亦傷立  
亦傷人生不自振何以奉高堂

凍蜨

獨宿枯枝上風霜雨不禁一寒教至此空有惜花心

煤香行

冬夕偶過宜少畊甫坐而崧祝三至遂同圍棋時  
新生火煤香滿室燈爲不明局未終遽去甫出門



聞大聲發於院中則少畊倒矣遂共扶掖之坐余  
與祝三隨亦病飲涼水坐良久始少解別後到家  
首痛猶若破也

昏烟塞室孤燈碧寒窓閃閃月微白子聲錚琤不見人  
滿屋煤香醉魂魄心搖目眩不可言匆匆辭主同出門  
霹靂一聲玉山倒僮僕賓客齊狂奔相將堦下同休歇  
骨痠筋騰心欲絕酒腸詩膽火紛飛昂頭卻恨冬風熱  
一甌泉水如瓊漿斗然鯨吸心神涼支頤少坐如夢醒  
滿庭月影凝清霜吁嗟乎人生災殃不可測奇禍無端

來頃刻天涯到處盡迷津見幾不早終自賊

### 經故居

一帶黃土牆兩閒破瓦屋庭前亂鳥飛檐邊枯樹密行  
行至敝門信步仍欲入鄰犬不吠人依依如昔日掉頭  
不忍住欲去還伫立依稀聞語聲半晌無人出天數有  
聚散人生有離合半年故居耳何必生憂悵

### 新履穿重著故者口占

故履做難著忻然易以新新者今已穿故者依舊存物  
以見廢久道以無爲尊乃知天下事適用卽爲珍

雜詩

無名何必求有名何必避有名與無名皆我身外事  
天地生我身與眾原無二悠悠流俗中何勞自矜異  
今朝有酒錢正可謀一醉醉後欲題詩迷離不成字

秋感

秋光滿天地無處不傷心落日荒城道西風枯樹林  
文章身後著憂患死前深獨立增悲感憑高淚濕衿

憶舊

但使身常在何愁氣不伸亂離三載運生死一家人  
學

仙聖集卷之十一  
名一  
淺難登仕身貧莫養親寒宵思舊事無語暗沾巾

中元

壯志銷磨盡虛生廿六春無能完骨肉有淚報君親  
蹭蹬羞逢鬼飢寒恥告人當頭秋月皎獨立暗傷神

鳴秋集 乙丑

階平摘白髮一莖題此贈之

姓字久沉淪詩才不救貧朱顏卅年老白髮一莖新落  
魄誰知已飛騰莫羨人浮生本虛幻攬鏡勿悲辛

渡江楫

三馬亡五胡起一王生二君死壯哉祖生誰可比渡江  
誓雪前朝恥事不能成心足喜

擊君衣

君取人頭我擊君衣衣猶可易頭將安歸拔劍大呼天  
地寒殺身易受辱難

秋曉不寐寄皆平

西風捲葉敲疏櫺寒燈一點如豆青兒啼索食婦起坐  
孤衾破碎涼如冰驚迴殘夢不能寐欹枕無言自垂淚  
回頭往事盡茫然煩惱懽忻總無謂年華彈指將三句

一事無成徒苦辛  
丈夫虛生軀七尺  
聰明自愧難如人  
空牀僵卧頻反側  
殘釭閃閃漸無色  
曉寒侵人愁倍增  
啼鳥一聲窓紙白

月下同皆平敘九閒步

月華滿地靜無塵  
樹影迢迢望倍真  
莫道風光不如昔  
同遊猶有去年人

歲餘集

乙丑

塞下曲

荷戈出玉關  
遠戍崑崙東  
離家二十年  
少壯已成翁  
君

王勤遠略將帥貪奇功嗟嗟征戍兒飄零如轉蓬  
危峯接青天驚沙翻烈風飲馬入石澗血流層冰紅無  
衣已堪嗟况復當嚴冬行將作餓殍誰暇爭邊功  
掬手飲澗泉殘冰破寒齒荷爰立荒林淚下如鉛水父  
母且難見何況妻與子生還知不能但願身早死  
馳馬登危崖雪深馬蹄折霜重鼓聲沈風急旌旗裂男  
兒受國恩臨敵當勇決拔劍脫重裘天寒戰血熱  
風沙何其狂霜雪何其涼關山何其險道路何其長士  
卒何其弱戎虜何其强昂首望上天涕淚沾衣裳

夢少畊

君死我未見君葬我未送心交盡如斯良朋復何用今  
夕忽見君中懷有餘痛覺後憶前情對燭頻增慟黃泉  
隔渺茫杯酒難重共不望君再生但願常入夢

閒吟集

丙寅

有感

生原是夢何求樂情不妨多莫妄施獨坐空齋淚沾臆  
半牆斜照欲無時

聞妙香集



仲秋八月夜兩夢少畊

君死已九月今夜兩夢君豈君魂果來抑我夢紛紜憶  
昔君在時朝夕同相親論詩復說賦握手懽難分我性  
素放蕩風月勞心神君每悲我痴苦口常諛諛自君舍  
我去我情益沈淪豈無相親者良言不可聞良友不再  
來藥石嗟無人何時載酒肴痛哭西郊墳

無謂集

丁卯

偶成

悽悽何所事朝夕獨悲傷有恨都成淚無愁亦斷腸半

生悲自誤廿載笑空忙彈指青年過升沈擬盡忘

羅宿集

丁卯

質女行

送女將出門女悲不忍行牽阿娘衣哭嚶嚶娘泣告女  
非娘棄爾娘不棄爾娘與爾俱死娘爲爾補衣娘爲爾  
裹頭速從人去勿使娘心煩憂爾勿嬾主人將詈爾爾  
勿傲主人將捶爾詈爾捶爾爾勿號爾號人以爲不祥  
主人將逐爾爾勿思娘爾爺歸娘使贖爾女泣告娘娘  
勿思兒思兒亦不能歸思兒亦無益思兒恐娘得疾兒

歸將何依女別娘去至主人家主人有女嬌如花小怒  
唾詈大怒鞭箠加終日飲泣難見阿娘與阿爺

偶成

回首空留恨匆匆欲壯時身名俱幻夢事業剩新詩已  
識生無謂深愁死有知一杯聊獨醉辛苦復何辭

七夕雨中作

但得親常在何憂家道難有身當自苦不死敢求安困  
頓心俱碎窮愁淚早乾涼宵未成寐剪燭自盤桓

四海

四海何年得止戈九天虛沐好恩波寇兵方報全離境  
飛騎俄傳已渡河師少遠謀防枉密軍無定策將空多  
豺狼滿地須除盡且莫匆匆奏凱歌

窮奇集

雨夜書懷

不死知非福偷安總自危一家同凍餒六合尙瘡痍困  
頓將誰告窮愁已莫支挑燈敲枕卧窓外雨聲遲

遊仙

古今有大道陰陽分地天開闢達混沌九轉成還丹日

月灼薪炭山川添汞鉛鬼神共煅鍊人物同熬煎爐鼎  
何所容十萬路八千火候何所終一十二萬年有時文  
火與世界同安全有時武火發劫運開連綿維持賴仙  
佛奔走勞聖賢迴還大造中變化通微元世運有降汙  
至道無變遷一朝乾坤毀萬類同茫然

呼童牽白龍龍矯不肯起一怒騰龍背飄然行萬里裁  
霞爲鞢韞折虹作鞭弭遊戲天衢閒頃刻周四海駕馭  
自有道奇材詎難使

少年慕仙道遠涉崑崙隈叩關登閬風元雲不肯開烟

霞阻徑途難覓金銀臺琪樹半摧折元圃多蒿萊敬告  
主人公良木宜栽培

大海起洪濤鯨鯢障空黑鼓鬣噴雲雷轟然震水國九  
河齊動搖三山欲欹側鬼鬼蓬萊宮飄飄不安宅安得  
許旌陽拔劍施神力一揮海水殷紅日無顏色

南風吹雲往北風吹雲回兩風橫相爭孤雲難去來傍  
有醉仙人大笑雲何癡漠然歸太虛風烈能何爲

睡起夜將半高坐崑崙巔大呼紅日出爲我燒金丹須  
臾一輪升飛上三神山天地忽分色萬物同昭然願得

留神光常照天壤間

劫至天地死運開天地生陰陽自開闔元氣常流行混沌豈晦塞開闢非昭明十二萬年中幻象成眞形寄言學仙者大道無時停

放舟渡明河星辰觸歸棹天達無燈燭明月作前導天孫裂雲羅昂然建高纛羽葆兩行排旌旆雲霓罩下界諸貴人冠蓋自相耀

淮南慕丹道清修世間鮮潛心數十年一朝得圓滿拔宅登太空仙官秩榮顯超升固美事奈何及雞犬

騰身立霞上至彼仙人家仙人恣遊戲擲米爲丹砂有  
砂可濟世無米難救飢勸君勿拋擲畱取生群黎  
高山有神仙道成長不死鍊藥成黃金靈術神無比白  
玉琢鼎鉉明珠飾鼎趾開鑪恣煎鍊朝夕無時止黃金  
信足珍神仙已如此

旣不能長生又不能早死苟活天地間萬事難由已禍  
患逼身家飢寒損心體金丹縱可成延年枉增耻雖得  
登神仙終難對父母翹首望仙山浩歌涕如洗

出何對吾 君入何對吾父家國兩懷慚長生亦何補



紅塵千餘丈中有一道士四時酒長春萬年詩不死出  
海吞胸中雲霞生腕底借問爲何人疑是太白李世人  
不能知棄之如敝屣

開雲種碧桃喚雨滋瑤草欣欣洞天中枝葉同美好秋  
來霜雪零萬卉皆枯槁靈根獨如故鮮妍不知老豈伊  
種類殊因地以爲寶

萬木盡凋謝寒霧迷遙空堅冰結大壑霜雪凝高峯策

馬渡溟渤言至蓬萊宮

亦作遠求  
安期公

春光何太遲爲我鞭

東風

偶齋詩草內集卷二

陽生集

宗室寶廷竹坡著

續窮樂府

并序

去年冬悲同人之窮戲作窮樂府八章以爲送窮  
神樂章蓋人已同言也今冬窮更甚窮居無聊復  
成六章以自遣所言皆已事不兼以他人蓋自顧  
不暇矣噫亦可以觀變矣

無衣歎

朝斷炊典寒衣空空兩袖寒侵肌寒侵肌不足歎老父

葛衣不掩骭

無食歎

朝無食夕無食老弱淒淒相對泣  
破甑然薪煎菽汁阿爺悽惶面菜色  
阿爺養我時膏粱酒肉無時虧

無火歎

鑪無火委席左父子縮首迎陽坐  
朝陽微微無暖氣老父今年六十二

無糕歎

昨索糕今索糕兒飢無糕頻哀號  
阿娘憐兒與寒粥兒

悲不食哭索肉阿娘撫阿兒汝爺明日煎肉糜

雪中感懷寄吳泉麓

時客保陽

朔風吹雪滿神京趙北燕南一望明寒樹接天山不見  
凍雲垂地野無聲兵戈空灑他鄉淚詩酒難追舊日情  
猶記去年梅放候騷壇相約訂同盟

我親衰老上公旬上奉養高堂憂莫供爾父飄零千里  
外相離異地幾時逢窮愁固結天難解壯志空存命不  
容在外在家同抱愧廿年回首恨填胸

窮途有淚向誰落故國無家何處歸十載干戈魂久斷

百年菽水願多違  
關山飄泊新愁重  
風月凋零舊夢非  
苦境自嘗甘自守  
旁人坐視亦沾衣

慈烏行

慈烏于飛垂其兩翼  
哀鳴嗷嗷循野求食  
求食不廉君休譏  
巢中有母猶朝飢

阿洪生三年授以五絕  
居然成誦感而有作

我生廿八歲耽詩  
空勞心爾生兩載餘  
亦復知謳吟告兒休  
自誇恐兒如阿耶

入官集

戊辰

放榜日作

竟得成進士及我親在時喜極反成悲涕泣雙漣而阿  
母死已久老父年亦衰屈指數往事氣噎心肝摧家門  
邁不幸中途悲式微父子迫飢寒廿載同流離艱難與  
險阻閱歷嘗無遺今年更窘迫已拚是死期疾病併灾  
殃安有求名思友朋共推挽勉強同入闈臨行拜高堂  
老父頻歔歔謂兒收與黜卽我生死機時乖諒難售孤  
注聊一爲含泣入試院強力搜文辭深宵納卷返未黜  
心已灰今日當揭曉境迫心愈危父子默相對癡坐頭

同垂傍午勉出門曳履行遲遲路逢相識者賀捷稱元  
魁木立不敢信問答形如迷逡巡候榜發隨眾偷一窺  
恍惚見名姓返首行如馳傍人環相賀如慚復如疑狂  
奔返蓬門金帖生光輝上堂拜老父相向忘言辭老幼  
同歡忻鄰里頻往來奔馳至日暮倦臥忘飢飢回頭念  
舊事倍覺心悽悽援筆成斯篇聊以抒中懷

展墓作

曠死廿二年兒始成進士驅車叩墓門母心亦應喜母  
喜兒不見兒悲母可聞悲喜兩茫然骨肉同路人

偶成贈芷亭

上天憫窮人不使終潦倒功名不足喜身家幸得保喜  
極反成悲怒焉傷懷抱青春難再來母死父已老

芷翁本高士原非功名人聞我成進士亦復增懽忻豈  
伊慕榮利喜我得養親飢寒倖少免奉養何辭勤韶光  
休匆匆爲我護靈椿

題錫子猷北征圖

烈火翻風塞天紫一家八口同日死隻身飛出刀劍叢  
頭帶骷髏行萬里丈夫恥生還上馬重出關揚鞭過北



庭矢志清邊塵 國恩未報父尸葬偷生鄉里何爲人  
哥舒仁貴不足說弱冠從軍忠勇絕憑將忠孝定天山  
豈屑區區競功烈南風捲地河流翻黃塵蔽日迷青門  
酒酣披圖壯心發淋漓熱淚沾金樽燕南趙北震鼙鼓  
安得留君靖豺虎

子猷名錫綸

### 書扇

讀書謀仕進欲博高堂歡豈料俸已得甘旨仍艱難顯  
揚盡虛語俯首嗟寒酸酒肉尙難期養志何輕言

### 松花

百尺虬枝拂彩霞羞同桃李鬪鮮華歲寒自有貞心在  
應候何妨也作花

蓮花

風波搖撼幾經時漫詔移根在鳳池歎息清高君子品  
汙泥濁水揔難離

梅花

雪魄冰魂別有姿天生玉骨倍清奇傍人但說花開早  
風冷霜寒只自知

桃花

輕薄端應逐水流  
妖紅冶紫繞隄稠  
能開亦復能吹落  
莫向春風笑不休

李臨淮刀

噫安得用此刀於范陽始變之日  
潼關未破之時  
強胡百萬何能爲將才世豈少用之  
苦不早

和陶靖節歸田園居

余生廿九年矣性迂緩復惰所學一無成本不樂仕進而家貧親老強從事焉今年夏入翰林方喜得微糈藉可養親而周赧臺高仍不足以奉甘旨

夫士之學古入官非圖富貴以自娛也今官卑秩  
散既不能宣力朝廷復不足以爲養徒藉此玉  
堂金馬以炫耀閭里不亦可笑乎偶讀陶集見歸  
田園居五詩不禁感愧交集爰抽毫和之意想所  
至非實境也倘獲養資卽償此志

夙性耽詩酒無意希縉紳勉強求微官藉以養吾親榮  
顯亦何樂奔走勞心神困身樊籠中進退同艱辛謀生  
乏智巧報國疎經綸縱得養親身終愁辜主恩安得  
百畝田挂冠歸故村躬畊奉甘旨永爲鄉里民

築室青山下桑麻繞庭院老親六十餘精力猶康健秋  
來同行稼曳杖周谿澗攜筐采山蔬歸家作晚飯飲酒  
招鄰翁繞牆共呼喚醉後眠土階破笠揮作扇

三尺黃土牆五間低草屋窓前對峯巒庭後多花竹酒  
熟婦同飲詩成兒代讀終日樂天倫翛然遠塵俗

農夫告春及日日來疇西荒田路行熟薄暮猶能歸明  
月出東林宿鳥相與飛小犬數聲吠兒童開竹扉牽我  
入室中爲我拂塵衣開釜取羹飯粗糲聊解飢

大雨三日晴荒田水盈瀆解衣挂楊枝臨流聊自浴夕

陽下平林炊烟起茅屋稚子隔溪呼家中黍飯熟

曰壯集

言志

科名誤學業仕宦損氣節熱心不自持身名遂俱裂丈夫有大志豈圖世人悅守拙甘困窮飛騰謝同列

吾生少所志所志惟詩酒富貴與功名未嘗介心口勉強登仕途出處亦頗苟虛名乏實用榮顯良堪醜努力建勳猷用以傳永久名士兼名臣千古垂不朽

詠史和左太冲

江梅開早春唐花榮暮冬以彼薰灼力傲此造化功嗟  
嗟寒酸士守道甘貧窮才華空抱負凍餒頻相攻點金  
無奇方雕蟲徒自雄不聞李翰林畢世終飄蓬

京華多顯宦九陌馳高軒簪纓耀朝日紅塵迷青門龍  
旗排錯襍白馬驅紛紜窮骨不可換落拓難爲羣騰身  
歸大荒把酒招仙人疏泉作滄溟疊石爲崑崙

紅埃滿燕市無處求荆卿壯士不再作大事愁難成成  
敗亦小節所爭在正名魯連不帝秦慷慨同此情

寄懷羅椒生夫子

男兒生世間受恩不可辜有志不得遂虛生七尺軀生  
我旣已矣知我終何如光陰不可留低首空長吁

憶昔戊辰冬貧極難卒歲老父衰且病衣食不能備夫  
子憫我窮重金慨然賜賜金何足云甘旨幸有賴人生重  
知已知遇恩良大乃知夫子恩更在知遇外

我生性迂拙無意希顯榮衰年無以慰勉強求科名科  
名幸已得吾親忽然沒養我廿八年養親十八月

窮骨本天授科第不能醫三年居木天猶自憂寒飢人



生無百年飢寒焉足悲罔極已莫報求醫將胡爲疎狂  
不合世進退同招譏會當立不朽上報親與師

田盤集

天井石

石在盤山東甘澗大盈丈架二石上石面上有穴  
如椀深尺餘出水不竭石不著地而有泉亦一奇  
也傍立天井石三大字

上不及天下不及地空中一石水出安自萬有生無可

悟道意

東遊集

壬申

法藏寺蟠龍松

老幹橫空蟠屈獨立蒼巖之隈莫笑不中繩墨夭矯終  
非凡材

養疴集

壬申

題壁

愁深病劇已難支忍辱低頭淚暗垂萬死那能逃眾口  
九泉誰爲護孤兒艱辛始覺親恩大挫折方知世道危  
坐擁寒衾心似割滿懷抑塞不勝悲

病中

往事皆成誤前途暗自危  
已知生計絕翻恐死期遲  
放誕人同棄迂疎世共嗤  
卅年彈指過伏枕默含悲

題壁

枕衾狼藉滿塵埃  
偃息窓前目倦開  
不死豈能除故態  
偷生自爲惜奇才  
新歡似夢何時續  
舊友如雲幾輩來  
三十年來成底事  
窮愁疾病兩相催

卧病

朔風吹骨冷難蘇  
飲泣中宵淚欲枯  
無藥無醫三月病

有妻有子一身孤  
迂癡自笑非名士  
懦弱深慚不丈夫  
大地茫茫千萬里  
誰能巨眼識窮途

飲酒

舊事回頭枉自悲  
牢騷滿腹有誰知  
窮愁固結渾難却  
病骨嶮嶮久不支  
放眼古今聊縱酒  
寄身天地且吟詩  
浮生哀樂皆虛幻  
反本歸原待幾時

病中寄芷亭五百字

憶昔甲子年與君  
始相見一見成心交  
兩心遂繾綣我性本狂癡  
君性復疎慢匪惟聲氣投  
性情兩無間綢繆

共相契朝夕同懽怵相交厯數年情好永忘倦洎至戊  
辰春我家罹憂患老父病在牀精力嗟委頓身寒少重  
衣腹餒缺珍膳醫藥憂無資奉養屢閒斷惟君憂我深  
百計日相援得錢分我用得米分我飯老父值壽辰囊  
空難啓宴賴君豫籌備稱觴得如願君家亦清寒衣食  
不盈羨分已以恤人推解忘貧賤是年我獲售南宮倖  
捷戰我身雖登第我家仍貧困惟君愛我至事事代籌  
算凡我所當爲竭力代營辦力所不能及乞鄰得流轉  
俾我養送資傷哉得無歎我生缺弟昆孤立憂無伴縱

使有手足深切終此邇豈意今年秋交誼忽生變遺我  
絕交書侃侃發正論怒我溺治遊責我背古訓力拒不  
容辭決然絕音問豈真情好乖愛極怒斯現外貌雖決  
裂中心實惓惓我生嗟不幸無才逢蹇運有父不能事  
日日斷炊爨悲哉始登第長抱風木怨養疾乏良藥送  
死幾不殯永作不孝人終年自飲恨以茲不自惜甘心  
就糜爛牢騷釀狂放一發不可按放情強歡笑俯身甘  
濁溷沈溺不自悟落魄心瞑眩豈不知謬誤邪緣日相  
眷事後枉追悔當局不容諫非我敢負君癡迷猝難喚

非君深拒我借端用激勸感君纏綿意愧我背決汗誓  
當返故轍改過力更換銳志樹勲名刻責深自奮中懷  
久鬱結隱曲無由獻悲憤藏無窮欲言逾千萬揮涕成  
長篇借茲發結愠折柬付飛鴻望君細展玩

西山集

癸酉

詩闕

望洋集

海口弔博多爾臺親王僧格林沁

壞雲壓水戰臺裂大海萬里化爲血火輪飛上闌江砂

萬戶哀號聲不絕僧藩矯矯真忠良殫心報國身家忘  
築臺拒敵保疆界軍威遠振驚重洋十年戰績一朝隕  
變生不測空悲憤謀非不善數難回功縱不成心已盡  
酒酣灑淚登高臺南風捲水濤聲哀海門一線接天末  
萬舟如陣隨潮來波心戰骨堆紛雜狂瀾汹涌髑髏立  
夜深月黑鬼燐飛冤魂滿水蛟龍泣吁嗟乎六龍北狩  
去不還三山宮殿成秋烟雙臺巋然至今在王兮王兮  
魂魄歸何年

經三义河口有感



霹靂一聲洋樓折萬刃千窓噴妖血魍呼魍號鬼胆裂  
火光照河龍宮熱壯哉王五人中傑奮身急難探虎穴  
豪士千百同勇決大呼殺賊肆奔突火焰騰霞刀飛雪  
觸火者焦觸刀缺北樓未燼南樓發烈焰緣河騰迅疾  
頭糜踵爛心膂絕肉煤骨炭哭嗚咽火焚未死入水沒  
尸流塞河河水溢銃燄礮熄船輪滅羣酋震驚股戰栗  
隻娥童勦靡單子金魚湯沸罕得脫事過論罪無驚怛  
引頸就死甘屠割義士捐金營幽室英雄墳名表氣節  
五人墓事同一轍古今互映光日月

葬城西南呼  
爲英雄墳事雖

未成夷氣奪至今歛跡弗敢越其人雖輕其事烈匹夫  
義勇勝賢哲嗟余無勇力薄劣英風逖聽冠衝髮拔劍  
起立不敢出浩氣滿懷心鬱結

贈程卓榮

并序

卓榮名仁思休甯人寄居閩門年近六旬家無寸  
土而好善不倦邑人感其誠醵金爲設育嬰堂歲  
救小兒無算得錢卽施不營生計長齋誦佛布衣  
蔬食未嘗自求安逸力行善事已四十年去歲北  
方大水先生聞而哀之思欲來救邑人爲醵三千

金航海至津謁李宮保官保命往文安設局救民  
每畝施民錢二百以買田種存活甚眾先生往返  
資斧皆另備不用此中毫釐事畢造冊陽赴李宮  
保報銷除赴蘇州城隍廟報銷予與先生邂逅旅  
舍備聞其事景慕高義賦此贈之

不商不賈不仕宦以善爲事老不倦非官非吏非鄉里  
背井離家救民死臆安得海內富人盡如君遍救四方  
欲死民

康林莊逆旅卧病

奔馳盡日困蹄輪倦卧孤衾淚滿巾空有妻孥誰我念  
并無僮僕欲何親荒村幽僻難尋藥破屋欹斜久積塵  
一穗寒燈半窓月分將清影照愁人

邦均鎮中秋病中感懷

遣懷幸有酒盈樽醉卧匡牀暗斷魂四野秋風欺病客  
萬山明月抱孤村家園瑣屑關心切鄰里歡呼聒耳煩  
旅恨窮愁兩難解牢騷鬱結不堪言

佳節良宵倍愴神離懷瘦損苦吟身客非易作偏兼病  
家本難拋况是貧少婦持書空悵望嬌兒索果枉悲辛

京華迢遞雲山隔翹首愁看月一輪

零星集

冰天夜禱圖

丁孝子字樂山丁中丞寶楨子性至孝母病每夜焚香禱天跪雪中求以身代母竟死孝子亦以病股亡

身代母竟死孝子亦以病股亡

嗚呼皇天胡竟死此子嗚呼皇天胡弗活此母開圖天下同一哭數窮天亦難論理名香一鑪燒中庭仰天號泣天震驚滿地霜雪不忍冷熱淚界面凝丹冰天不許兒同母生天難禁兒隨母死力竭氣盡不能回同入重泉心亦喜卧冰禮斗亦有人棄身殉親孰如此吁嗟乎

我生不幸母早亡大恩未報中心傷  
老父撫育廿四載教養事事勞高堂家貧親老缺奉養五年衰病難辭  
牀倖得升斗慰遲暮一旦棄我推肝腸玉堂金馬盡虛  
語夜臺何處誇顯揚撫今追昔五中戚覽圖涕泣沾衣  
裳噫我親已沒我尙存我生不孝慚斯人

偶齋詩草內集卷三

使越集

癸酉

宗室寶廷竹坡著

水灾行

河泊角勝水互爭九河鑿戰洪濤騰飛廉赤松助威勢  
畿輔平地波瀾生橫衝直突不可遏建瓴而下鋒難撓  
山移川改天地變燕趙頃刻成揚荆順保河天半汨沒  
滙爲巨浸連滄溟我奉 命往典越試圻堠一路畿南  
經水泥阻滯不能越輶車棄擲同揚舫自新城以南車  
不可行予與正  
考官徐君季和乘小  
舟以濟備嘗艱苦蒿目灾區涕沾臆離居蕩析悲羣

氓田廬墳墓盡水底禾稼湮沒同漂萍屋宇人空蛟龍  
據城市路漲帆檣行燕南趙北白波溢連橋十二嗟歛  
傾官吏束手不能救挑渠築壩空勞形我聞治水比治國  
全局籌畫功方成補苴罅漏罔有濟疏其流必其源清  
遐邇一體盡赤子分疆絕界非持平利此害彼豈王政  
鄰國爲壑何爲能巢居營窟胡以活水患未已兼蝗螟  
悲哉小民命有幾苟延殘喘良可矜尾閭不泄沃焦濕  
神禹故道尋難明吁嗟水災何時甯誰將此語聞天庭

李家庄讀弔科爾沁博多勒噶台親王僧格林沁



詩

大旗風折陣雲寒  
馬革尸香血未乾  
拂拭舊詩頻淚墜  
成功容易得民難

寄懷王蘭君

君家魯我家燕  
河山迢遞途二千  
君客燕我客魯  
故土他鄉互賓主  
何時兩地一轉移  
各變他鄉爲故土  
吁嗟乎功名富貴亦何補  
人生窮達皆自苦

寄懷文鏡寰

鏡寰老名士  
才性兩超羣  
酒醉應思我  
詩成每憶君  
離

愁訴明月鄉夢逐歸雲自別青門後狂歌久不聞

寄內

轉眄梅花放征輶得得歸江南風雪少不必寄寒衣

癸乙襍鈔集

上

癸酉奉 命典浙試自啓行至杭州一路所爲詩

皆存於冊名曰使越集入闈專心校閱不暇他及  
榜發始復爲詩因俗事擾人未暇存稿本性疏懶  
隨遇苟安自此遂無詩稿今秋偶與友人談山水  
憶及出使題壁諸作大半遺忘友人以爲可惜促

補鈔之爰憶自榜發後至今所爲詩襍鈔成帙隨  
憶隨鈔不成次序有忘半而補成者有全忘而補  
作者亦有忘而不能補者半非本來面目聊以紀  
實耳題曰癸乙襍鈔集

浙江聚奎堂題壁

癸

出世奇才未易尋  
燈前幾度費沈吟  
休誇此日衡文眼  
莫忘當年下第心  
玉氣微茫山靄重  
珠光隱約海波深  
英豪埋沒知多少  
蕊榜書成愧不禁

浙江試院偶成

癸

文章載大道甘苦誰深知棄取少不慎難免真材遺他  
年子若孫亦有赴試時

憶我初赴試堂上有老親我親老且病我家窶且貧累  
戰不得售困頓埋風塵老親望我切日夜馳心神卅年  
倖一第烏哺心微伸奉養未幾時長逝悲靈椿我今銜  
王命浙水司衡文穰穰多士中豈無親老人

二月二日紀 恩恭賦 乙

一封書上侍臣驚報 國何辭越俎名學淺不知言語  
妄位卑自覺死生輕未能謹慎循官守惟把狂愚答

聖明 盛世由來容直諒諸君莫但頌 昇平

飲酒 乙

烈日懸中天照乾一庭血

庚午春白晝庭中忽有血跡自東壁來初作碎點至中庭

橫斜揮洒方丈有餘細點密排大痕盈尺過此復成淋漓碎點自門一綫不絕洒至門外溝邊糞坑始沒觀之可畏其多決非飛走物所能有其細碎亦非諸物所能爲在晝尤奇乃非人意想可到之異間人亦莫能辨其由從來積善家安有此妖孽回頭念舊事慄然心膽裂凶兆來有由尋源增驚怛躊躇復躊躇臨事難勇決哀哉重泉人日夜哭不絕

觀人有卓識要當觀其大一端苟可取小失亦何害木

大枝易斜石大形多怪全材世罕觀安能苛責備丈夫  
有大志細微孰留意但求古人許甘爲今人棄窓外有  
青山相對且一醉

謁孤山林小巖先生墓

癸人

公諱汝霖福建上杭

烽烟繞空吳山紫西湖尸滿血流水遍城達官半逃亡  
一典史耳何足死死爲誰小巖林闔室殉節人神欽  
忠孝兩盡無遺憾千秋耿耿存丹心老父已出母已亡  
見危授命何傍徨詩成絕命鬼神泣巨觥手把升公堂  
一冠哀公欲生公一冠怒公竟公賊天旣許公爲忠臣

寇欲不殺公不得丈夫一死等閒事強項不知刀劍利  
血腥滿室作酒香斷首置几口猶詈佳兒激烈有父風  
包村起義難成功哀哉大讐不能報戰骨卧地鴿原空  
堂西掘土忠骸見生氣懍懍凝死面七年藁葬始遷棺  
龍章褒寵承恩眷孤山深處起高墳血染梅花豔  
色新地下高人應大笑身後得與忠臣鄰

晏城旅舍題壁

癸

迢迢半載走征騑回首江鄉夢已非仕宦俗情嘗委細  
山川勝境記依稀書因路近翻難得客爲家貧反怕歸

獨坐茅廬自惆悵小窓一角上斜暉

吳山題壁

癸

吳山居城中不染塵俗氣烟火日薰蒸峰巒自蒼翠如  
彼疎狂人胸無利名累雖在仕宦場超然有逸致

烟霞洞題壁

癸

吳越王夢僧告曰吾兄弟離散  
有數人在山後醒而跡之此洞刻六

羅漢補  
足之

佛法亦人情喜聚不喜散賢哉吳越王補此阿羅漢萬  
古戲烟霞永無離別歎

岳王廟題壁

癸



靖康北狩康王與弟尸兄位忘厥兄不殺岳王和不成  
正統北擄郕王起弟守兄位兄奪弟英宗復辟于公死  
庸主貪位忘其親信任邪辟屠忠臣忠臣枉死天不憐  
天數既定天無權吁嗟人力難回天

于少保廟題壁

癸

留得大明天下在知公雖死亦甘心奇功獨建驚朝野  
大獄沈冤悲古今萬代忠魂餘幻夢三台荒墓對空林  
森嚴廟貌西湖上拜倒階除涕滿襟

六月二日作

甲

孤憤填胸怒不禁一陽安得退羣陰有懷報國知何  
日無力回天剩此心草欲當風慚弱質葵思向日抱愚  
忱舉頭聞闔高千丈路絕丹梯迥莫尋

鼠虎集

丙子至戊寅

謁韓公祠恭賦

丙

昌黎韓公非詩人一朝大儒兼名臣正直感通鬼神喜  
上書罵佛佛不嗔筆驅鱷魚出南海高吟驚破衡山雲  
再逐荒陬幸不死重爲博士甘沈淪兒寒妻飢人弗問  
生屈卑秩亡尊神嗟余小子性迂拙宦途奔走悲苦辛

八載西清困筆墨無才獻賦慚神仙蓬萊逐出不許住  
青宮借宿歸成均來瞻廟貌肅起敬瓣香虔奉懷惟寅  
高山仰止景前哲摩挲石鼓欽鴻篇我生好詩兼好直  
欲將狂妄驚乾坤背翻詩草寫諫草高吟不怕蒼天聞  
丈夫豈屑作才子直節妄想垂千年我公神明見應笑  
孺子可教需陶甄人生富貴胥由天放懷前進休逡巡  
讀聖賢書當自立幸勿虛入櫺星門

收新疆

戊

十載苦爭戰勤勞將帥同班超真有福李廣竟無功已

喜邊疆靖還憂府庫空中原多餓殍禱祀望年豐

平陽賈

戊

辭家二十年遠賈留京師故鄉遭奇災安得不一歸入  
境何所見樹樹盡無皮野獸不噬人飽卧依積尸到家  
不見人屋宇埋塵埃父母已無骨安問子與妻前村有  
阿姊久別當一窺見面不相識抱首泣漣漣贈金却不  
受促弟行勿遲道此人爲糧頗不憂餓飢糠粃久盡絕  
有金將胡爲恐爲鄰舍見割弟供晨炊感姊愛弟切既  
見何忍離閭境皆餓殍縱活能幾時不如爲人食猶勝

飽狼豺老親魂魄在地下堪相隨

朔州賊

戊

有客從南來道逢北來賊見人不敢殺捉臂但索食自  
言良家子世代同力畊苟得分賑糧孰樂從賊行從賊  
已經旬未嘗獲一飽豈不忍剽掠村鎮無遺藁官軍追  
襲急就擒在尺咫惟願速誅戮免得終飢死病妻饑未  
死已遭鄰人瞰縱爲官軍誅幸逃割烹慘哀哉此良民  
何辜逢歲凶但聞邊塞將屢報殲賊功

河間民

戊

大車復小車行行過城市老弱滿車載憔悴面如鬼云  
是河間民資遣歸鄉里或笑或號咷同行襍悲喜喜者  
得歸畊悲者無依倚無田何所歸不如身流徙甯願老  
他鄉不願返桑梓在外或暫生歸家當遘死但聞截漕  
糧未見放賑米縱有清廉官人眾獲無幾秋成尙需時  
枵腹何能待辜負 朝廷恩自恨無生理

中州女

戊

吳客來中州息轅投旅次入門見二女涕泣求爲婢  
客言旅囊拙路遠難攜帶大女跪不起苦求救厥妹與

其同一死不如各爲計雖難延繼嗣骨肉才遺在客出  
買衣歸小女獨垂淚問女何爲泣道姊歸屠肆疾趨共  
往視女尸卧平地泥血半糝糊面目猶可記始知家無  
食二女肉已賣小女幸逃死大女充羹膾哀哉復哀哉  
人命如犬彘大吏解組歸兒女飽酒食

雨甚壁頽無錢修葺戲倣杜子美茅屋爲秋風所

破歎作老屋爲夏雨所破歎

戊

經旬久霽忽大雨老屋壁頽餘半堵其半已傾半猶豎  
甍石參差露梁柱三伏沈陰雨連綿日夜浸滌空愁歎

西壁崩摧修補難東壁侵久泥將穿夜雨淅瀝檐不乾  
窗紙濕破風入寒瓦縫漏滴如巖泉灰泥亂墜盈枕邊  
病姬膽怯憂不眠殘燈閃閃明牀前相對無語萬感集  
咫尺性命愁如懸從來爲室譬爲國國有四邊室四壁  
壁之弗堅室將傾綢繆未雨謀當亟若待陰雨始葺補  
棟折椽崩禍不測

哭吳子雋

觀禮

戊

子雋身死心不死上有幼君下老母嗚呼真忠臣嗚  
呼真孝子吾屬虛生良足恥



密雲不雨行擬李長吉

戊

雨工醉飽倚龍睡甘霖懸虛不及地烟霾羅空更白晝  
大天小天隔不漏瑤臺金闕慵不開足短莫上疇梯堦  
地下無日天上常明陽輝不照葵花自傾

戊卯集

戊寅己卯

哭吳柳堂

可讀

大雪漠漠連薊門凍雲愁結忘陽春單車東去號孤臣  
孤臣一去生不還手攀荆鼎思登天頸帛斷絕鴟入  
咽解豸怒觸驚生前阜鵬死鳴聞天關萬民涕泣哭忠

魂九重褒寵垂絲綸  
聖朝納諫優直言伏闕抗疏  
爭紛紜以死建言公一人吁嗟乎直諫容易死殉難

竹添進一以蜀江圖屬題書廿字應之

卯

東海萬千里漫漫總下流休云濫觴小飲水憶源頭

送人從軍

戊

武將刀文臣筆筆端墨刀頭血筆禿心不灰刀斷項不  
折丈夫豈屑悲離別放眼四海心肝熱努力報國建  
功烈

與牧菴皆平飲酒醉後偶成

卯

牛兔棗栗萃一腹酒醉不飯吾亦足相視而笑真奇事  
如我輩相竟食肉仕隱儒道皆可慚踐土食毛空飲啄  
酒酣放眼六合寬火山飛紅海水綠推倒三教伊何人  
老歎佛悲孔子哭颶風橫捲巨鰲翻旋轉三千六百軸  
春秋戰國總平世往跡陳陳書枉讀拔劍欲起醉不支  
縮頭僵卧閉雙目

黔中吟送張振軒

樹聲

之貴州

卯

殷宗伐鬼三年克荒陬自茲通中國靡莫夜郎雄坤極  
連山四塞不容地戈戟挺空飛翮避天卑地狹巖洞萃

三苗分北遺孽萌獸學人語禽人形龍固燕堡巢窟盈  
送君南去愁且歎境僻俗悍嗟凋殘削平容易生聚難  
頌聲滿吻留三吳振軒曾撫江蘇江腴山瘠先後殊獨爲其難  
乃丈夫

消寒四詠

卯

火酒

與水同其清與火同其熱甘以存溫和辛以表剛烈朔  
風捲地陰雲結草木凍折凝冰雪一杯頃刻返陽春痼  
冷沈寒立銷滅

石炭

媧皇鍊石補天闕餘滓燒殘下入地富媼慷慨不愛寶  
破山出骨煖人世南木西竹晒柔脆石火光留萬民利  
清泉香餅歸田誇北京水利占旣濟異方奇淫逞技巧  
薰蒸機械騰火氣然鍊爲炬地角穿煎水旋舟海腹沸  
取多用宏易匱乏土產不足中濟外燕山鑿斷碣石傾  
楚岫剗平玉泉碎雞籠崔崔恣搜尋礦師橫行生番避  
雲根萬丈化青烟穴虎無家夜垂淚今年京師煤價高  
縣吏追呼增新稅明駝負茗爭出關蓬戶停炊冷疏食

但見巨艦往復來載向他邦鑄兵器

木棉

恥隨羣卉爭顏色吹開不需東風力得氣應時亦作花  
有功民生同黍稷柳棉蘆絮自輕狂勸君采取休誤識

草薦

男兒自生一腔血醉卧沙場骨猶熱況有草薦堪藉身  
高枕誰知滿天雪錦裯繡衾豈無人深宵顛倒勞夢魂

後養疴集

庚辰

鄭烈婦詞

金華吳氏

大風吹銀潢牽牛破雲墜  
傍有織女星相隨同落地  
滔滔三江水一去東不還  
哀哀鄭氏婦貞烈垂萬年